

МЕСЯЦА ЯНВАРЯ В 10-ЫЙ ДЕНЬ.

СВЯТИТЕЛЯ ФЕОФАНА, ЗАТВОРНИКА ВЫШЕНСКАГО

НА ВЕЛИЦЕЙ ВЕЧЕРНИ

На Господи, воззвах: стихиры, глас 1:

Приидите, вернии, * благочестно ублажим святителя Христова Феофана, * пастыря предобраго, учителя златословеснаго, * скорбных утешителя, * наставника всех притекающих к нему с верою * и ныне молящагося о душах наших.

Святителю отче Феофане, * память твоя, яко светозарное солнце возсия нам, * озаряющи приходящия к тебе с верою и просящия усердно: * моли спастися душам нашим.

О преблаженне отче Феофане, * человеце Божий и верный рабе, * сосуде избранный Духа Святаго, * Царствия Божия наследниче, * мир Церкви Православней испроси, * стране нашей благоденствие, * всем же верным в вере утверждение, * грехов оставление и от бед избавление.

Слава, глас тойже:

Отче Феофане богомудре, * аще и в тайных подвизех течение совершил еси, * обаче светильник пресветлый людем явился еси, * лучами словес твоих просвещая нас, * научаеши Христа ведети. * Темже радостно поклоняющесе раце честных мощей твоих, * со умилением взываем: * слава Прославляющему святыя Своя.

И ныне, праздника.

Вход. Прокимен дне, и чтения.

Притчей чтение (главы 10, 3 и 8):

Память праведнаго с похвалами, и благословение Господне на главе его. * Блажен человек, иже обрете премудрость, и смертен, иже уведе разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава. От уст ея исходит правда, закон же и милость на языке носит. Послушайте убо мене, о чада, честная бо реку, и блажен человек, иже пути моя сохранит: исходи бо мои – исходи живота, и уготовляется хотение от Господа. Сего ради молю вас и предлагаю мой глас сыновом человеческим. Яко аз, премудрость, устрой совет, и разум и смысл аз призвах. Мой совет и утверждение, мой разум, моя же крепость. Аз мене любящия люблю, ищущии же мене обрящут благодать. Разумейте убо, незлобвии, коварство, ненаказанныи же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзки же предо мною устны лживыя. С правдою вси глаголы уст моих, ничтоже в них стропотно, ниже развращенно. Вся права суть разумевающим и проста обретающим разум. Научаю бо вас истине, да будет о Господе надежда ваша, и исполнитесь Духа.

Премудрости Соломоновы чтение (главы 10, 6, 8 и 9):

Уста праведнаго каплют премудрость, устне же мужей мудрых ведут благодать. Уста мудрых поучатся премудрости, правда же избавляет их от смерти. Скончавшуся мужу праведну, не погибнет надежда. Сын бо праведен раждается в живот и во благих своих плод правды обьмет. Свет праведным всегда, и от Господа обрящут благодать и славу. Язык мудрых добрая свесть, и в сердце их почиет мудрость.

Любит Господь преподобная сердца, приятни же Ему вси непорочнии в пути. Мудрость Господня просвещает лице разумнаго. Постигает бо желающия ю, прежде даже разумети ю, и удобь узрится от любящих ю. Утреневавый к ней не утрудится, и бдяй ея ради вскоре без печали будет. Яко достойных ея сама обходит, ищущи, и во стезях ея является им благоприемне. Мудрости никогдаже одолеет злоба. Сих ради и рачитель бых доброты ея, и возлюбих ю, и поисках от юности моя. И взысках невесту привести себе, яко всех Владыка возлюби ю. Таибница бо есть Божия хитрости и обретательница дел Его. Труды ея суть добродетели: целомудрию же и разуму та учит, правде и мужеству, ихже потребнее ничтоже есть в житии человеком. Аще же и многого искусства желает кто, весть древняя и быти хотящая рассмотрит. Свесть извития словес и разрешения гаданий, знамения и чудеса проразумеет и сбытия времен и лет, и всем советник есть благ. Яко безсмертие есть в ней и благославие во общении словес ея. Сего ради беседах ко Господу, и помолихся Ему, и рех от всего сердца моего: Боже отцев и Господи милости, сотворивый вся словом Твоим и мудростию Твоею устройый человека, да владеет бывшими от Тебе тварьми и да управляет мир в преподобии и правде. Дажь ми Твоих Престолов приседающую премудрость и не отлучи мене от отрок Твоих, яко аз раб Твой и сын рабыни Твоея. Посли ю с Небес от святого жилища Твоего и от Престола славы Твоея, да, сущи со мною, научит мя, что благоугодно есть пред Тобою, и наставит мя в разум, и сохранит мя в славе своей. Помышления бо смертных вся боязлива и погрешительна умышления их.

Премудрости Соломоновы чтение (главы 4, 6, 7 и 2):

Похваляему праведнику, возвеселятся людие. Безсмертие бо есть память его, яко от Господа познавается и от человек и угодна Господеви душа его. Возлюбите убо, о мужие, мудрость и поживете, восхоптите ея и наказани будете. Начало бо ея любви и соблюдение закона. Почтите премудрость, да во веки царствуете. Возвещу вам и не скрыю от вас таин Божиих: яко Той мудрости Наставник есть, и мудрых Исправитель, и всякому смыслу и делу Хитрец, и всем смыслом научит мудрость. Есть бо в ней Дух разумен и Свят, и сияние Света Присносущнаго, и образ благости Божия. Та други Божия и пророки устроает. Благолепнейши же есть солнца и паче всякаго сотворения звезд, свету сосуждаема, обретается первейши. Та угождающих ей от болезней избави и настави на стези правыя. Даде им разум имети свят, и сохрани я от ловящих, и подвиг крепок подаде им. Да разумеют вси, яко сильнейши всего есть благочестие. И никогдаже преможет злоба мудрости, ниже преидет злыя, обличающи суд. Рекоша же в себе, помысливши неправедно: насильствуем праведному, не пощадим преподобства его, ни усраммся седин старости многолетны. Будет бо нам крепость закон, и уловим праведнаго, яко неугоден нам есть, и противится делом нашим, и поносит нам отпадение закона, и обличает нам согрешения наказания нашего. Возвещает нам разум имети Божий и отрока Господня себе именует. Бысть нам на обличение помышлением нашим, и тяжек нам есть, и видимь, яко неподобно иным житие Его и изменены стези Его: в поругание вменихомся Ему, и удаляется от путей наших, яко от нечистот, и блажит последняя праведных. Увидим убо, аще словеса Его истинна суть: искусим, яже сбываются Ему. Руганием и мукою истяжем Его, да разумеем кротость Его, и искусим беззлобство Его: смертию безобразною осудим Его, будет бо посещение от словес Его. Сия помыслиша и прельстишася: ослепи бо я злоба их, и не разумеша таин Божиих, и не

разсудиша, яко Ты еси Бог Един, живота имей и смерти власть, и спасаей во время скорби, и избавляей от всякаго зла, Щедр и Милостив, и дая преподобным Своим благодать, и Своєю мышцею гордым противляся.

На литии стихиры, глас 3:

Феофане преблаженне, * чудотворче преславнейший и верных заступниче, * сосуде, благодати преисполненный, * и милости источниче, * о нас молися ко Господу, * помиловатися душам нашим.

Отче богомудре Феофане, * благий и верный друже Господень, * святителей украшение и отцев слава, * якоже в житии, тако и по преставлении твоём, * Дивный во святых Своих Бог * исцелений благодать тебе дарова, * и ныне непрестанно молися о нас ко Господу, * помиловатися душам нашим.

Преблаженне Феофане, * словес Евангельских верный хранителю, * вольную нищету, яко сокровище, на себе подъяв, * чистоту иноческаго жития сохранил еси, * образ смирения по образу Господа своего являя, * и ныне предстоя Престолу Вседержителя, * молися прилежно о нас, * совершающих священную память твою.

Слава, глас 8:

Днесь красуется обитель Вышинская * и торжествует вся Церковь Православная, * совершаючи память твою, святителю Феофане, * дивная бо и преславная чудеса яви тобою Господь, * егда честныя мощи твоя прославити благоволи. * Темже к тебе прибегаем и молимся: * молися о нас ко Господу, * помиловатися душам нашим.

И ныне, праздника.

На стиховне стихиры, глас 5:

Подобен: Радуйся:

Радуйся, отче наш Феофане, * скорый в скорбех утешителю, * радуйся, иноков и инокинь наставниче, * радуйся, словом своим и делом всех к Богу приводяй, * и ныне предстоя Престолу Святыя Троицы, * молися прилежно о нас, * совершающих светлое сие торжество.

Стих: Честна пред Господем * смерть преподобных Его.

Радуйся, святителю Феофане, * Церкви Российския преславное украшение, * обители Вышинския светлая похвало, * Православия столпе непоколебимый, * радуйся, молитвенниче наш пред Богом, * Емуже предстоя со всеми святыми, * молися о нас, чтущих святую память твою.

Стих: Священницы Твои облекутся в правду, * и преподобнии Твои возрадуются.

Радуйся, архиерею Божий, * смирения и кротости зеркало, * любве неистощимое сокровище, * аще и в затворе пребывал еси, * людей же, духовнаго утешения жаждущих, не оставлял еси, * темже и мы к тебе, яко отцу, прибегаем * и любовию взываем: * молися о нас ко Господу, * спастися душам нашим.

Слава, глас тойже:

Преблаженне отче Феофане, * дом Духа Святаго явился еси, * ума чистоту стяжав, * в затворе Вышинския обители многолетне пребывая, * писаньми твоими всех просвещал еси, * верою к тебе прибегающих, * и ныне не престай приносить моления о нас, * чтущих священную память твою.

И ныне, праздника.

По Ныне отпускаеши: и Трисвятом:

Тропарь, глас 8:

Православия наставниче, * благочестия учителю и чистоты, * Вышинский подвижниче, святителю Феофане богомудре, * писаньми твоими Слово Божие изъяснил еси * и всем верным путь ко спасению указал еси, * моли Христа Бога спастися душам нашим. (Дважды)

Тропарь праздника единожды.

НА УТРЕНИ

На Бог Господь: тропарь праздника дважды.

Слава, тропарь святого, глас 8:

Православия наставниче, * благочестия учителю и чистоты, * Вышинский подвижниче, святителю Феофане богомудре, * писаньми твоими Слово Божие изъяснил еси * и всем верным путь ко спасению указал еси, * моли Христа Бога спастися душам нашим.

И ныне, праздника.

По 1-м стихословии седален, глас 8:

Непостижимый Свет от Света, Христос Господь, * почив в тебе, святителю Феофане, * пресветла суца показа тя миру, * яко блистаеши светлым житием, * озаряеши лучами учений, сияеши чудесы: * темже ныне празднуем святую память твою.

Слава, и ныне, праздника.

По 2-м стихословии седален, глас 8:

Непостижимый Свет от Света, Христос Господь, * почив в тебе, святителю, * яви тебе яко ревностна свидетеля истины в Церкви Своей, * в радость и спасение всех, * любовию чтущих память твою.

Слава, и ныне, праздника.

По полиелеи седален, глас 4:

Премудрый учителю, * твердый истины Христовы поборниче, * утверди сердца наша в вере православней, * к тебе прибегаем и тебе молимся, * молися о нас ко Господу, * святителю отче Феофане.

Слава, и ныне, Богородичен:

Необоримая Предстательнице оскорбляемых * и теплое заступление уповающих на Тя, * от бед и искушений избави нас, * Богородительнице Пречистая.

Таже степенна, 1-й антифон 4-го гласа.

Прокимен, глас 4: Честна пред Господем * смерть преподобных Его.

Стих: Что воздам Господеву о всех, яже воздаде ми?

Всякое дыхание:

Евангелие от Иоанна, зачало 35 от полу.

Рече Господь ко пришедшим к Нему иудеем: аминь, аминь глаголю вам, не входяй дверьми во двор овчий, но прелазя инуде, той тать есть и разбойник. А входяй дверьми пастырь есть овцам. Сему дверник отверзает, и овцы глас его слышат, и своя овцы глашает по имени, и изгонит их. И егда своя овцы ижденет, пред ними ходит, и овцы по нем идут, яко ведут глас его. По чуждем же не идут, но бежат от него, яко не знают чуждаго гласа. Сию притчу рече им Иисус, они же не разумеша, что бяше, яже глаголаше им. Рече же паки им Иисус: аминь, аминь глаголю вам, яко Аз есмь дверь овцам. Все, елико их прииде прежде Мене, татие суть и разбойницы, но не послушапа их овцы. Аз есмь дверь, Мною аще кто внидет, спасется, и внидет и изыдет, и пажить обрящет.

По 50-м псалме стихира, глас 6:

Излияся благодать во устнех твоих, * святителю Феофане, * Богоявления воистину проповедник в земли Российской явился еси, * писаньми бо твоими вся учиши * веровати в Троицу, во Едином Божестве.

Канон праздника и святого, глас 8, егоже краегранесие:

Радуйся, Феофане, Вышинский подвижникче.

Песнь 1

Ирмос: Воду прошед, яко сушу, * и египетскаго зла избежав, * израильтянин вопиаше: * Избавителю и Богу нашему поим.

Радостно приносяще хваление, смиренно к тебе припадающе, просим: прими недостойное моление наше, святителю отче Феофане.

Ангеле земный и человеце Божий, в затворе Вышинския обители пребывая, непрестанно моляся ко Господу, изъяснял еси людям путь ко спасению.

Днесь сопедшися, вернии, восхвалим песньми и пеньми духовными святителя Феофана, нашего приснаго к Богу молитвенника.

Богородичен: Утверди нас, Мати Божия, в вере Сыну и Богу Твоему, дивно прославляющему угодники Своя и други их нарицающему.

Песнь 3

Ирмос: Небеснаго круга * Верхотворче, Господи, * и Церкви Зиждителю, * Ты мене утверди в любви Твоей, * желаний краю, верных утверждение, * Едине Человеколюбче.

Имя твое, святителю Феофане, яко миро, землю нашу облагоуха, услаждающе сердца верных, призывающе всех к духовней радости и спасению.

Святче Божий, угодниче Христов Феофане, призри на немощи наша и исцели души наша, страстьми присно обуреваемыя.

Яко пчела трудолюбивая, с луга духовнаго мед писаний отеческих нам предлагаеши, святителю, во спасение с молитвою к тебе притекающих.

Богородичен: Феофане святителю, прииди, стани с нами, да прославим вкупе Пресвятую Деву, Христа Бога Рождающую.

Седален, глас 8:

Житие твое славно бысть и усмение со святыми, * святче Божий Феофане, * ныне же у Престола Всевышняго предстоиши, * молися о нас, всеблаженне, * да спасет Господь души наша.

Слава, и ныне, праздника.

Песнь 4

Ирмос: Ты моя крепость, Господи, * Ты моя и сила, * Ты мой Бог, Ты мое радование, * не оставль недра Отца * и нашу нищету посетив. * Тем с пророком Аввакумом зову Ти: * силе Твоей слава, Человеколюбче.

Феофане святителю, разум твой мудре Христу вверил еси, Царствия вечнаго сподобися, моли ныне вся Премудростию Сотворшаго, да спасет души наша.

Егоже возлюбил еси, Егоже Единого возжелел еси, Егоже ради в затворе подвизался еси, моли ныне, да спасет души наша.

Образ был еси богоданней пастве твоей, словом, житием, любовию, духом, верою и чистотою. Сего ради ты яко истиннаго пастыря почитаем, Феофане, отче наш.

Богородичен: Феофане богомудре, молися о нас Пресвятей Владычице Богородице, да Своим всеильным предстательством умолит Христа спасти души наша.

Песнь 5

Ирмос: Вскую мя отринул еси * от Лица Твоего, Свете Незаходимый, * и покрыла мя есть чуждая тьма, окаяннаго, * но обрати мя и к свету заповедей Твоих * пути моя направи, молюся.

Ангели на Небеси радуются, человецы на земли духовно торжествуют, память совершающе святителя Феофана, дивнаго о всех нас молитвенника.

Научи нас, блаженне Феофане, ведети Христа, Света истиннаго, просвещающаго всякаго человека, грядущаго в мир.

Егоже воинства Небесная славят, в житии своем непрестанно прославляя еси, научи и нас, святче Божий, добродетельми Господа славити.

Богородичен: Вышшую Небес и Чистую светлостей солнечных, избавльшую нас от клятвы, Владычицу мира песньми почтим.

Песнь 6

Ирмос: Очисти мя, Спасе, * многа бо беззакония моя, * и из глубины зол возведи, молюся, * к Тебе бо возопих, и услыши мя, * Боже спасения моего.

Шел еси тесным путем ко спасению, кроткий Кроткому взывая непрестанно: мне прилепятся Богу благо есть.

Истины Христовы вожделев, скорби и обиды радостно терпел еси, помышляя непрестанно, якоже венец без победы, такожде победа без подвига не бывает.

Не забуди нас, чад твоих, отче Феофане, в дому Отца Небеснаго пребывая, и сподоби молитвами твоими в чертог Господа Славы внити.

Славу и вся сокровища мира презрел еси, неуклонно шествуя к горнему миру, и ныне радостию ангельскою радуешься, отче наш, святителю Феофане.

Богородичен: Кто Тебе не ублажит, Пресвятая Дево? Кто ли не воспоеет Твоего Пречистаго Рождества? Моли, Чистая, Всеблаженная, Сына Твоего и Бога помиловатися душам нашим.

Кондак, глас 4:

Богоявлению тезоименитый, * святителю Феофане, * ученьми Твоими многи люди просветил еси, * со Ангелы ныне предстоя Престолу Святыя Троицы, * моли непрестанно о всех нас.

Икос: Якоже явление Божественных дарований воистину показался еси земли Российстей, святителю Феофане, пастырю добрый стада Христова, вразумляя житием, словом и писанием наставляя. И ныне Престолу Пресвятыя Троицы предстоя, со дерзновением воздевая преподобней руке твоей, моли непрестанно о всех нас.

Песнь 7

Ирмос: Божия низхождения * огонь устыдеса в Вавилоне иногда. * Сего ради отроцы в печи радованною ногою, * яко во цветнице, ликующе, пояху: * благословен еси, Боже отец наших.

Крестный путь Подвигоположника Христа выну пред собою имея, путем тесным, ведущим в жизнь вечную, шествовал еси, блаженне, взывая непрестанно: благословен Бог отец наших.

Илии Фесвитянину ревностию подражал еси, святителю Феофане, любовию Божественною сердце твое распалая, в терпении душу твою стяжал еси, вопия: благословен Бог отец наших.

Истины Божественныя ревностный проповедниче, мудростию словес твоих и учений, отче Феофане, наставляеми, купно с тобою поем ныне: благословен Бог отец наших.

Богородичен: Подаждь утешение рабом Твоим, Богородительнице Марие, да вопием с Тобою к Сыну Твоему и Спасу нашему: благословен Бог отец наших.

Песнь 8

Ирмос: Седемрицею пещь * халдейский мучитель * богочестивым неистовно разжже, * силою же лучшею спасены сия видево, * Творцу и Избавителю вопияше: * отроцы, благословите, * священницы, воспойте, * людие, превозносите во вся веки.

Отроцы, благословите, священницы, воспойте, людие, превозносите Христа во веки, совершающе велие торжество прославления угодника Божия, святителя Феофана.

Достойно воспевати Божию Славу научал еси всех, проповедниче благочестия Феофане, и нас, ныне с верою пришедших к тебе, сему научи, да славится имя Божие во веки.

Веры твердый поборниче, благочестия мудрый проповедниче, православия изрядный богослове, Феофане, Вышинский затворниче, сподоби нас, недостойных, в радости духовней воспевати Господа, превозносимаго во вся веки.

Богородичен: Исцелений струи всегда верным подаеши, Мати Божия, исцели души наша, молитв ради угодника Божия Феофана, да славим Рождество Твое, Пречистая, и превозносим во вся веки.

Песнь 9

Ирмос: Ужасеся о сем Небо * и земли удивипася концы, * яко Бог явися человеком плотски * и чрево Твое бысть пространнейшее Небес. * Тем Тя, Богородицу, * Ангелов и человек чиновачалия величают.

Жизни вечныя сподобился еси, святителю, буди ходатай и молитвенник теплый о нас к Богу, верою память твою священную празднующих.

Новый воистину чудотворец явился еси, Феофане богомудре, яко целитель премилостивый и врач безмездный душ и телес всех с верою к тебе притекающих, милуя и утешая и щедроты твоя преизобильно изливая.

Истинно явился еси молитвенник теплый о нас к Богу, испроси, отче, у Творца всяческих прегрешений оставление всем с верою и любовию тя величающим.

Человече Божий, верный друже Христов, приими милостивно моления наша и принеси я ко Престолу славы Господа, Крещением Своим Иорданския струи освятившаго.

Богородичен: Егоже воинства Небесная славят, Егоже во чреве носила еси, Богомати Пречистая, моли ущедрити и спасти души наша.

Светилен:

Светильника, свыше просвещаемого, * светом Божественным осияема, * святителя Феофана, радующся, песньми почтим.

На хвалитех стихиры, глас 7:

Возсия нам богоугодное житие твое, * святителю отче Феофане, * Вышинский затворниче, * все плотское мудрование духу повинул еси, * молися о нас, * совершающих священную память твою, * да спасет Господь души наша. [Дважды.]

Подвигов иноческих и воздержания зеркало, * любви же и смирения сокровище неистощимое явился еси, отче Феофане, * темже чтуще святую память твою, * венчавшаго тя Христа прославляем, * Егоже усердно моли, * да спасет души наша.

Человече Божий * и верный угодниче Христов, Феофане, * безмолвия рачителю * и един Единому Богу собеседниче, * помяни нас, чтущих святую память твою, * и принеси теплыя твоя молитвы ко Господу, * да спасет души наша.

Слава, глас тойже::

Благочестия мудрый проповедниче, * Православия изрядный богослове, * изъяснял еси людям тайны жизни духовныя * и тако многия к вере в Троицаго Бога привел еси, * темже чтуще святую память твою, * богоносне отче Феофане, * купно с тобою взываем: * Троице Святая, Боже наш, слава тебе.

И ныне, праздника.

Славословие великое.

НА ЛИТУРГИИ

Служба праздника и святительская.

Молитва

О святителю отче Феофане, архиерею преславный и предивный затворниче, Божий избранниче и Таин Христовых служителю, богомудрый учителю и апостольских словес изрядный изъяснителю, отеческих добротолюбных сказаний писателю, христианскаго благочестия изящный проповедниче и жизни духовныя искусный наставниче, подвигов монашеских усердный ревнителю и всем людем благодати ходатаю! Ныне к тебе, на Небесех Богу предстоящему и о нас молящемуся, припадаем и сице взываем: испроси у всещедрого Бога Церкви Российстей и стране нашей мир и благостояние, святителем Христовым – истины Божественныя достойное охранение, паствы доброе окормление, лжеучителей и еретиков изрядное посрамление; подвизающимся – смирение, страх Божий и чистоту душевную и телесную; учителем – боговедение и мудрость, учащимся – ревность и помощь Божию; и всем православным – утверждение на пути ко спасению, да вкупе с тобою прославим Божию Силу и Премудрость, Господа нашего Иисуса Христа, со Безначальным Его Отцем, с Пресвятым, Благим и Животворящим Его Духом, ныне и присно, и во веки веков. Аминь.